

疑

獄

箋

疑獄箋序

疑獄之屬凡二一日情事之疑一日法律之疑
盜也而賊無可憑也以爲殺也而仗無可據也雖犯
者自以爲是吾則無所取徵此情事之疑也呂刑曰
五刑之疑有赦五罰之疑有赦及曰墨辟疑赦云云
是也盜既無可疑矣形迹在是強是竊之介殺
可疑矣情狀在似故似毆之間此法律之疑也
謨曰罪疑惟輕是也或者不能申明疑獄
罪疑惟輕云者凡情迹未明賊無

入之有謂墨辟疑赦其罰百鍰云者身迹未明賊
仗無據者罰之鍰以贖之夫不能定其事之是非而
姑令納鍰不能辨其情之誠僞而姑從末減雖甚昏
贖吏應所不爲而謂臯陶明允呂侯祥刑有之萬萬
無此理王制曰凡聽五刑之訟必原父子之親立君
臣之義以權之意論輕重之序慎測淺深之量以別
之必察小大之比以成之此于法律之疑而求其協
中之道也又曰悉其聰明致其忠愛以盡之疑獄汎
與衆共之衆疑赦之此于情事之疑而求其明允之

實其罪者也讀者每謂呂侯當日於五刑之疑而赦者卽罰以百鍰千鍰不等夫疑則非實實則非疑赦則非罰罰則非赦此皆截然不可混合者乃讀者不知疑字之辨誤合赦與罰而一之并忘閱實其罪之義往往不得其解愚恐後世沿襲成訛槩以疑罰必至人極于病因箋疑獄而論及云

康熙辛未年六月二十四日陳芳生自識

疑獄箋目錄

卷一

平大獄

君側中傷

親屬真僞之辨

娠月考異

僞書券

匿名書

狂瘖

盜嫁禍

代刑

有外奸

失婢妾

卷二

寡婦訟子

新婦獄

盜未識面

火起有辨

中分所爭物

爭物必取其微

輕重大小廣狹多寡之準

走

吐

桌帷

借盜

虛言探真情

探事人

謬罰

假誤決

牛驢之盜

割牛舌

瓜菜之盜

愚盜

給盜家

買物識盜

假盜致盜

假棺

盜官

刀

傷

殺人於門

何以知夫死

奸婦被殺

奸夫誤殺

卷三

婦無首

即店舟人殺人

假屍首

飲食毒

聽聲

察色

假鬼

旋風僧牒附

蛇犬

卜

夢

鬼訴冤

人妖

妖人

妖僧

假疑獄

庶獄

附疑獄集原序三首

卷四

刑官執法

名分情理

原貸

容隱

遇赦

保辜

誤因人成罪

謀爲傷因

緣坐

復讐赴難之義

代死

父喪

親屬相殺

侵失官物

家財

誣昏

嫁母

主僕

發塚

疑獄箋卷一

高郵王鼎臣訂 仁和陳芳生著

平大獄

田叔

李泌

挺擊之獄

寒朗

唐某御史

張行岌

王祐

呂夷簡

張文懿

錢若水

王大臣之獄

梁孝王使人刺殺故相袁盎。景帝召田叔案梁。具得其事。乃悉燒獄詞。空手還報。上曰。梁有之乎。對曰。有之事安在。叔曰。焚之矣。上怒。叔從容進曰。上無以梁事爲也。上曰。何也。曰。今梁王不伏誅。是漢法不行也。

如其伏法而太后食不甘味臥不安席此憂在陛下也於是上大賢之以爲魯相

德宗貞元中張延賞在西川與東川節度使李叔明

有隙上入駱谷叔明子昇等六人扈從有功及還長

安上皆以爲禁衛將軍寵遇甚厚延賞知昇出入部

國大長公主第

部國大長公主肅宗女適駙馬密以都尉蕭升其女爲德宗太子妃

白上上謂李泌曰部國已老昇少年何爲如是泌曰

此必有欲動搖東宮者誰爲陛下言此上曰卿勿問

第爲朕察之泌曰必延賞也上曰何以知之泌具言

二人之隙且曰昇承恩顧典禁兵延賞無心中傷而
郃國乃太子蕭妃之母故欲以此陷之耳上笑曰是
也

明神宗愛鄭貴妃子福王似有易儲意又皇太子久
不出閣講學福王久不之國奸人窺伺媒孽其間遂
有妖書挺擊等獄妖書事詳
匿名篇萬曆癸丑七月武人王

日乾訐奏奸人孔學與貴妃宮中姜內相莊上歌盟
請妖人王三詔至家咀呪太子又刻木爲太后皇上
像釘其目又約趙思聖在東官侍衛帶刀行刺語多

涉貴妃福王、閣臣葉向高具密揭慰上懷云、臣訪得王日乾孔學等、原係京城光棍、此事大類往年妖書、但妖書匿名無可究治、故難於處置、今告者與被告者皆見在法司一審、其情立見、自伏其辜、皇上但靜以處之、不必張惶、一或張惶、則中外紛擾、其禍將不可言、彼奸人不過拚一條性命、乃國家之所損多矣、是反墮其計中也、上先覽日乾疏、大怒、徬徨莫知所處、至掀翻御案、左右皆辟易、莫敢言、已見向高揭、默然辭容、將揭疏、積藏之、向高復密奏、速令福王之國、

上納之。甲寅三月，福王之國河南。乙卯五月，募有男子闖入東宮，以挺擊仆守門內侍一人，韓本用等呼集執之。皇太子奏送刑部鞠審，犯人姓張名差，御史劉廷元疏言其跡涉風魔，貌似黠猾。郎中胡士相等定爲風癲，提牢官王之案重加詰問，言有馬三道，誘至龐劉二太監處，語多涉鄭國泰、國泰貴妃也。出揭自白，科臣何士晉請窮其事。上大怒，急傳百官進見皇太子侍，三皇孫立階下。上諭曰：「昨有風癲張差突入東宮傷人，此是異事，與朕何與？外庭有許多閒。」

說你每誰無父子。乃欲離間我父子耶。適見刑部郎中趙會禎問的招情。止將本內有名人犯張差龐保劉成。卽時處死。其餘不許波及無辜一人。尋執東官手示羣臣曰。此兒極孝。我極愛惜他。又以手約皇太子體曰。彼從三尺養至今。成丈夫矣。我有別意。何不於此時更置。至今長成。又何疑耶。又顧問皇太子。你有何話。一同說來。太子云。似此風癲之人。決了便罷。不許株連。又曰。我父子何等親愛。爾等無聽流言。爲不忠之臣。使我爲不孝之子。上悅。閣臣因請東官出。

講羣臣乃出尋誅張差龐保劉成事遂寢

東漢明帝時或告楚王英與王平顏忠等造爲圖書有逆謀窮治累年其辭語相連自京師親戚諸侯州郡豪傑案吏阿附坐死徙者以千數而繫獄者尚數千人英陰疏天下名士上得其錄有吳郡太守尹興名乃徵興及掾吏五百餘人詣廷尉就考諸吏不勝掠治死者大半惟門下掾陸續主簿梁鴻功曹吏駟勲備受五毒肌肉消爛終無異辭上乃赦興等禁錮終身顏忠王平辭引隊卿侯耿建朗陵侯臧信復澤

侯鄧鯉曲成侯劉建、建等辭未嘗與忠平相見。是時上怒甚，吏皆惶恐，諸所連及，率一切陷入，無敢以情恕者。侍御史寒朗心傷其冤，試以建等物色獨問忠平，而二人錯愕，不能對。朗知其詐，乃上言：「建等無好，專爲忠平所誣，疑天下無辜類多如此。」帝曰：「卽如是，忠平何故引之？」對曰：「忠平自知所犯不道，故多有虛引，冀以自明。」帝曰：「卽如是，何不早奏？」對曰：「臣恐海內別有發其奸者。」帝怒曰：「吏持兩端，促提下捶之。」左右方引去，朗曰：「願一言而死。」帝曰：「誰與共爲章？」對曰：「臣

獨作之上曰何以不與三府議對曰臣自知當必族
滅不敢多汚染人上曰何故族滅對曰臣考事一年
不能窮盡奸狀反爲罪人訟冤故知當族滅然臣所
以言者誠冀陛下覺悟而已臣見考囚在是者咸
共言妖惡大故臣子所宜同疾今出之不如入之可
無後責是以考一連十考十連百又公卿朝會陛下
問以得失皆長跪言舊制大罪禍及九族陛下大恩
裁止於身天下幸甚及其歸舍口雖不言而仰屋竊
嘆莫不知其多冤無敢牾陛下言者臣今所陳誠死

無悔。帝意解。詔遣朗出。後二日。車駕自幸洛陽獄。錄囚徒。理出千餘人。時天旱。卽大雨。馬后亦以楚獄多濫。乘間爲帝言之。帝惻然感悟。夜起。徬徨。由是多所降宥。任城令袁安。遷楚郡太守。到郡。不入府。先往案楚王英獄事。理其無明驗者。條上山之。府丞掾史皆叩頭爭。以爲阿附反者。當與同罪。不可安。曰。如有不合。太守自當坐之。不以相及也。遂分別具奏。帝悟。卽報下。得出者四百餘家。

唐高祖舉義師於太原。李靖與衛文昇爲隋守長安。

乃收皇族害之及平關中誅文昇等及靖靖言曰公
定關中惟覆私仇亦爲天下耶若爲天下未得殺靖
乃捨之爲岐州刺史或有人希旨告靖謀反者高祖
命一御史往按之謂曰李靖反狀實便可處分御史
知其誣罔請與告事者偕行行數驛御史佯失告狀
驚懼異常鞭撻行典乃祈告事者曰李靖反狀分明
親奉聖旨今失告狀幸救命告事者乃別疏狀與御
史驗其狀與元狀不同卽日還京以聞告事者伏誅
折獄龜鑑曰按唐李靖傳靖未嘗爲岐州刺史亦

無誣以謀反者小說載事多失實不足信然辨誣之術苟有可取亦不當廢也

則天朝或誣告駙馬崔宣謀反者勅侍御史張行岌按之其告者先誘藏宣家妾乃誣云宣有妾將發其謀宜殺之投死屍於洛水行岌案畧無其狀則天怒令重案行岌奏如初則天曰崔宣反狀分明寬縱之耶我令俊臣案勘汝當勿自悔行岌曰臣推事不若俊臣陛下委臣必須實狀若順旨妄陷平人豈法官所守臣以爲陛下試臣耳則天厲色曰崔宣若實有

妾反狀自然明矣。不獲妾如何自雪。復案不成。則令
俊臣推勘。汝勿悔也。行炭懼。乃逼宣家訪妾。宣再從
弟思兢。乃於中橋南北多致錢帛。募匿妾者。數日。畧
無所聞。而宣家每竊議事。則獄中告者輒知之。思兢
揣宣家見有同議者。乃詐謂宣妻曰。須絹三百疋。僱
俠客殺告者。語已遂。侵晨微服伺於臺側。宣家有館
客舒某。婺州人。言行無缺。爲宣所信任。同於子弟。思
兢須臾見客至臺。賂門人以通告者。遽稱云。崔家僱
刺客殺我。請以聞。臺中驚擾。思兢素重館客。客不知

其疑也。思兢密隨至天津橋，乃罵曰：「若陷崔宣，必引汝同謀。何路自雪？」汝幸出崔家妾，我遺汝五百緡歸鄉，足成百年之計。不然，殺汝必矣。」客悔謝，乃引思兢於告者之黨，搜獲妾，宣得免。告者伏誅。

宋王晉公祐，事太祖爲知制誥。太祖遣使魏州，以便宣付之。告曰：「使還，與卿王溥官職。時溥爲相也。」蓋魏州節度使符彥卿，太宗夫人之父。有飛語聞於上，公往別太宗於晉邸。太宗却左右，欲與之語。公徑趨出。公至魏，得彥卿家僮一人，挾勢恣橫，以便宜決配而

已及還朝。太祖問曰：汝敢保符彥卿無異意乎？祐曰：臣與符彥卿家各有百口。願以臣之家保符彥卿。又曰：五代之君多因猜忌殺無辜。致享國不長。願陛下以爲戒。帝怒其語直。貶護國軍行軍司馬。華州安置。七年不召。太宗卽位。以兵部侍郎召。不及見而薨。初公赴貶時。親賓送於都門外。謂公曰：意公作王溥官職矣。公笑曰：祐不做。兒子二郎必做。二郎者文正公旦也。公素知其必貴。手植三槐於庭。曰：吾子孫必有爲三公者。已而果然。天下謂之三槐王氏云。

慶曆中呂許公罷政事以司徒歸第拜晏元獻公殊
章郇公得象爲相乃以諫官歐陽修余靖上疏罷夏
竦樞密使其他升拜不一是時石介甫爲國子監直
講獻慶曆聖德頌褒貶甚峻而于夏竦尤極詆斥至
目之爲不肖及有手鋤姦桡之句頌出泰山孫明復
謂介甫曰子之禍自此始矣未幾黨議起介在指名
遂罷監事通判濮州歸徂徠山而病卒會山東舉子
孔直溫謀反或言直溫嘗從介學于是英公言于仁
宗曰介實不死北走敵矣尋有旨編管介之子于江

淮又出中使與京東刺史發介棺以驗虛實。是時呂夷簡爲京東轉運使，謂中使曰：「若發棺空而介果北走，則雖孥戮不足以爲酷，萬一介死，未嘗叛去，卽是朝廷無故剖人塚墓，何以示後世耶？」中使曰：「誠如金部言，然則若之何以應中旨？」夷簡曰：「介之死，必有棺斂之人，又內外親族及會葬門生，無慮數百，至於舉柩窆棺，必用凶肆之人，今皆檄召至此，劾問之，苟無異說，卽皆令具軍令狀以保結之，亦足似應詔也。」中使大以爲然，遂自介親屬及門人姜潛以下，并凶肆

棺歛昇柩之人合數百狀皆結罪保證中使持以入奏仁宗亦悟竦之譖尋有旨放介妻子還鄉而世以夷簡爲長者

張文懿罷相由范文正攻彈也文懿復相一日仁宗語文懿曰范仲淹嘗有疏乞廢朕可施行之文懿曰仲淹法當誅然不見章疏乞付外施行上曰未嘗見其疏但比有爲朕言者且議其罪文懿曰其罪大無他法無文案卽不可行望陛下訪之凡數日則一請其疏月餘凡十數請上曰竟未見之然爲朕言者多

矣。可從末減。日人臣而欲廢君。無輕典。既無明文。則不可以空言加罪。上意解。卽曰。仲淹在外。初似疑。今既無疑。可稍遷之。以慰其心。上深然之。

李繼隆討夏。與轉運使盧之翰有隙。欲陷之罪。乃檄轉運司期八月出塞。令辦芻粟。轉運司調發方集。繼隆復爲檄。言據陰陽人狀。國家八月不利出師。當更取十月。轉運司遂散芻粟。既而復爲檄云。得保塞胡偵候狀。告賊且入塞。當以時進軍。芻粟卽日取辦。是時民輸輓者適散。倉卒不可復集。繼隆遂奏轉運司。

乏軍興。太宗太怒，立召中使一人，付三函，令乘驛馳取轉運司盧之翰、竇玘及某人首。丞相呂端、樞密使柴禹錫皆不敢言。惟樞密副使錢若水爭之，請先推驗有狀，然後行法。上大怒，拂衣起入禁中。二府皆罷。若水獨留。廷中不去。上既食，久之，使人偵視。廷中有何人，報云有細瘦而長者尚立焉。上出詰之曰：爾以同州推官再期爲樞密副使，朕所以擢任以爾爲賢耳。乃不才如是耶？尚留此安俟？對曰：陛下不知臣無狀，使得待罪二府，臣當竭其愚衷，不避死亡，補益陛

下以報厚恩。李繼隆外戚貴重莫比。今陛下據其一
幅奏書。誅三轉運使。雖有罪。天下何由知之。鞠驗事
狀明白。加誅何晚。上意解。乃召呂端等奏請。如若水
議。先令責狀。許之。三人皆黜爲行軍副使。旣而寇欲
入塞。事皆虛誕。繼隆坐罷。招討知秦州。

萬曆初。內閣張居正欲傾首輔高拱。陰結司禮太監
馮保以圖之。拱慮保專恣。與居正謀去之。居正陰泄
於保。已與保謀逐拱。明年有浙東人王大臣者。故投
充總兵戚繼光三屯營爲南兵。不遂流落都下。大臣

巧捷便佞無鬚髯得入一中貴家中貴昵之正月庚子宿中貴巾服闕掖廷直抵乾清宮門上方出朝大臣色勃股戰以犯蹕執揣驗之男子也袖有佩刀馮保立鞠之曰南兵王大臣自戚總兵所來保使密報居正居正令附保耳曰戚公方握南北軍據危疑地且禁毋妄指此中自有作用可借以除高氏保因令大臣供稱高使改籍曰武進縣卽令家奴辛儒衣大臣蟒袴予二劍劍首飾猶睛異寶送繫厥中入以聞請究主使人居正亦上疏如保意上卽付保鞠保令

辛儒屏語大臣曰第言高閣老怨望使汝來刺願先
首免罪卽官汝錦衣賞千金不然重榜掠死矣因使
儒昇大臣金美飲食之儒日與大臣狎欵卽令誣拱
家奴同謀獄具保飛發五校械拱奴而居正前疏傳
中外中外籍籍謂且逮拱吏部尚書楊博左都御史
葛守禮詣居正語以公論居正不自安始言上前度
處之上命馮保葛守禮都督朱希孝會審希孝慮事
不得白有憂色博曰事無難公第使善調校尉入獄
詢刀劍口語所從來雜高家奴稠衆中令別識且問

見高公何所。今在何地。立辨矣。希孝如博言。使善調校尉。密詢大臣。何自來。則來自保所。語盡。出保口。校尉卽告大臣。入官謀逆法族。奈何甘此。若吐實。或免罪。大臣茫然哭曰。始給我主使者。罪大辟。自首無恙。官且賞。豈知此。當實言。適高家奴逮至。希孝雜諸校中。令物色。大臣不辨也。及會審。故事。當雜治。大臣呼曰。故許我富貴。何雜治也。馮保卽問曰。誰主使者。大臣瞪目仰面曰。爾使我。乃問也。保氣奪。強再問。爾言高閣老何也。曰。汝教我。我豈識高閣老。希孝復詰其

蟒袴刀劍。曰。馮家奴辛儒所予。保益懼。遂罷。保外飲。大臣生漆酒瘡之。而內以拱行刺事上聞。有殷太監者。年七十餘。老矣。在上前。跪奏曰。高閣老故忠臣。而何爲此。隨顧保曰。高鬍子正直忠臣。張蠻子奪他首相。必欲殺之。我輩內官。何須助彼。保大沮。而太監張宏亦力言其不可。於是下刑部擬罪。止大臣論斬。拱乃得全。

臣之於君。固當盡心致身以事之。而不知其他。君之於臣。尤宜推心置其腹中。不可有纖芥嫌疑。伏

於至隱。令小人得以窺其隙而乘之。以致豪傑之士。不自安而變作也。漢高帝之誅功臣。疑諸臣之必反。諸臣之果反也。亦由於高帝之疑。說者多歸咎于房。不能調劑。竟陵鍾惺至謂沙中謀反一語實啓其禍。要之君臣相疑。自古爲戒。君而直則還中山之謗書。君而巧則從貫珠之攘恩。臣而巧則廣司馬穰苴蕭鄴侯之田宅。臣而直則爲狄武襄之幽鬱于陛下。疑爾一言。此其上下之交都如蹈虎尾。涉于春冰。雖曰世風遞降。使然。夫亦君臣間

各有未盡其道者在也。伊尹專廢置而太甲不以爲嫌。郭汾陽薄天子不爲而祿位名壽極人臣之樂。王守仁平寧王之變。或疑其有反謀。上曰。守仁學道人。何反之有。霍子孟雖脫然于上官之詐。而宣帝常惴惴如坐針氈。史稱其出入禁闕。小心二十餘年。而終病其不學無術。後之處此境者。君卽不能如太甲之于伊尹。亦當如唐之于郭子儀。明武宗之于王新建。臣卽不能爲阿衡之咸有一德。汾陽之有再造功。亦當如陽明之學道。內外調劑。

諸人卽不能如李鄴侯王晉公呂夷簡張文懿諸人之善于匡救亦當爲某御史張行茂錢若水之曲爲解紛庶几讒間不得終成泰交之道或可因之弗替也與至于官闈之獄爲臣子者能格君心之非使弭變于未形上也密防閑之道能杜患于將萌次也不幸適際其成惟有化大事爲小事化有事爲無事而已田叔李鄴侯葉向高所稱古大臣者非耶

君側中傷

昭僖侯

晉文公平公

光武

孫亮

昭僖侯之時宰人上食而羹中有生肝焉昭侯召宰人之次而詰之曰若何爲置生肝寡人羹中宰人頓首服死罪曰竊欲去尚宰人也一日僖侯浴湯中有礫僖侯曰尚浴免則有當代者乎左右對曰有僖侯曰召而來譙之曰何爲置礫湯中對曰尚浴免則臣得代之是以置礫湯中

文公之時宰臣上炙而髮繞之文公召宰人而譙之

曰。女欲寡人之哽耶。奚爲以髮繞炙。宰人頓首再拜。請曰。有死罪三。緩礪砥刀。利猶干將也。切肉肉斷而髮不斷。臣之罪一也。援木而貫鬚。而不見髮。臣之罪二也。奉熾爐。炭火盡赤紅而炙熟。而髮不燒。臣之罪三也。堂下得無微有疾臣者乎。公曰善。乃召其堂下而譙之。果然。乃誅之。一日。晉平公觴客。少庶子進炙而髮繞之。平公趣殺炮人。毋有反令。炮人呼天曰。嗟乎。臣有三罪死而不自知乎。平公曰。何謂也。對曰。臣刀之利。風靡骨斷而髮不斷。是臣之一死也。桑炭炙

之肉紅白而髮不焦。是臣之二死也。炙熟又重曉而視之。髮繞炙而目不見。是臣之三死也。意者堂下其有翳憎臣者乎。殺臣不亦蚤乎。

東漢陳正爲大官令。黃門侍郎。與正有隙。因進御食。以髮貫炙中。光武嚼炙見髮。怒。勅斬正。正曰。臣罪有當死者三。黑山出炭。增冶吐炎。焦膚爛肉。而髮不銷。臣罪一也。匣出佩刀。匠石砥礪。虧肌截骨。曾不能斷髮。臣罪二也。臣朗月書章奏。側光讀經書。旦臨御食。臣與丞及庖人六目齊視。曾不如黃門兩目。臣罪三

也。詔乃罪黃門而釋正。

吳廢帝亮字子明。暑月遊西苑。方食生梅。使黃門至中藏取蜜。蜜中有鼠矢。亮問主藏吏曰。黃門非有求于爾乎。吏曰。彼嘗從臣覓官席。臣不與。亮曰。必爲此也。易知耳。令破鼠矢裏。燥。亮曰。若久在蜜中。當濕透。今裏燥。必黃門所爲。于是黃門首服。

晉文五伯之雄。光武中興盛主也。兩幾不免于前人之場。而況其下焉也者。明四目達四聰。若是乎其未可憐。情矣。昭信侯吳廢帝。善矣。使充類而長。

之大業。豈有旣焉。抑聞之唐太宗。方食醬。有蟲。吞之。勿使露。恐庖人獲罪。明太祖膳中有髮。召光祿臣詰之。光祿臣曰。龍鬚也。上因自拂鬚墮。二莖於。是日。汝可去。語云。不痴不聾。難作家翁。盛王之道。容有無事乎。察察者與。

親屬真偽之辨

雋不疑

黃霸

李崇

程灝

尹洙

張希崇

邢吉

魯穆

陳茂烈

韓億

于文傳

李南公

李若谷

山西巡撫子

童妃

始元五年有一男子乘黃犢車建黃旒衣黃襜褕著黃冒詣北闕自謂衛太子公車以聞詔使公卿將軍中二千石雜識視長安中吏民聚觀者數萬人右將軍勸兵闕下以備非常丞相御史中二千石至者並莫敢發言京兆尹雋不疑後至叱從吏收縛或曰是

非未可知。且安之。不疑曰：諸君何患於衛太子？昔蒯
瞿違命出奔，輒拒而不納。春秋是之。衛太子得罪先
帝，亡不卽死。今來自詣，此罪人也。遂送詔獄。天子與
大將軍霍光聞而嘉之，曰：公卿大臣當用經術明于
大誼，由是聲重於朝廷。廷尉驗治何人，本夏陽人，姓
成，名方，遂居湖。以卜筮爲事，有故太子舍人嘗從方
遂卜，謂曰：子狀貌甚似衛太子。方遂心利其言，幾得
以富貴。卽詐自稱詣闕，廷尉逮，召鄉里識知者張宗、
祿等。方遂坐誣罔不道，要斬東市。

馮猶龍曰。國無二君。此際欲一人心。絕浮議。只合如此斷決。其說春秋雖不是。然時方推重經術。不斷章取義。亦不足取信。公羊以衛輒拒父爲尊祖。想當時儒者亦主此論。附公羊傳曰。曼姑受命于靈公而立輒。曼姑之義。固可以距蒯聵也。輒之義。可以立乎。曰可。奈何。不以父命辭王父命也。

潁川有富室兄弟同居。婦皆懷妊。長婦胎傷。弟婦生男。長婦奪取以爲己子。爭訟三年。州郡不能決。丞相黃霸令走卒抱兒去。兩婦各十步。叱令自取。長婦抱

持甚急。兒大啼。叫弟婦恐致傷。因而放輿而心甚懷
愴。霸乃叱長婦曰。汝貪家財。欲得兒寧。慮頗有所傷
乎。此事審矣。婦伏罪。

後漢李崇爲楊州刺史。壽春縣人苟泰有子三歲。失
之後。見在趙奉伯家。各言已子。並有鄰證。郡縣不能
斷。崇乃令二父與兒各別禁數處。故人不問。忽一日
密遣人分告二父曰。君兒昨不幸遇暴疾死。苟泰聞
卽號咷。不自勝。奉伯咨嗟而已。崇察知之。乃以兒還
泰。奉伯伏罪云。先亡一子。故妄認之。

李惠斷燕巢事卽此一理所推也。魏雍州廳事有燕爭巢。鬪已累日。刺史李惠令人掩護。試命紀綱。斷之。並辭惠乃使卒以弱竹彈兩燕。旣而一去一留。惠笑謂屬吏曰。此留者自計爲巢功重。彼去者旣經楚痛。理無固心。羣下服其深察。

廣東肇慶府有前夫後夫爭一妻者。問官久不決。迨後府節推唐某鞠之。前夫曰。妻吾結髮。始因貧故。今宜贖回完聚。後夫曰。始棄義絕。嫁我可復奪乎。各執有詞。及問婦所欲歸。則惟上所裁耳。俱模

稜唐亦不能判乃佯怒其婦曰因汝尤物使曲直混淆惟置汝於死兩造息矣叱婦置獄不許兩夫餽食教獄卒曰嗣後取審汝只謬云婦方死矣卒領諾經數日亟召二夫至亦召婦獄卒忽報婦死唐愕然曰何故遽死嘆惜久之已而讓二人曰爭由汝等致傷一命葬埋誰任之間後夫俯首不語問前夫則曰從幼結髮今雖死義不可背我當任之唐笑曰觀此言訟決矣卽斷婦歸前夫。按肇慶之斷蓋法李崇而失之者也李崇以爭子真偽

難定故試其情之誠否以爲斷。肇慶爭婦則明知其爲前夫後夫也者。此則禮與法有一定矣。何事徵諸葬埋而後決乎其暗於道也。蓋與嫁母杖骨之事同。

程察院顥知澤州晉城縣。富民張氏子父死未幾晨起有老父在門曰我汝父也來就汝居。具陳其由。張氏子驚疑莫測。相與詣縣請辨之。老父曰業醫遠出治疾。妻生子貧不能養。以與張氏。某年月日某人抱去。某人見之顥謂曰歲久矣爾何說之詳也。老父曰

某歸而知之。書於藥法冊後。因懷中取冊以進。其記
曰。某年月日。某人抱兒與張三翁。顯問張氏子爾年
幾何。曰。三十六。爾父在年幾何。曰。七十六。謂老父曰。
是子之生。其父年四十。人已謂之。三翁乎。老父驚駭。
服罪。

尹龍圖洙。知河南府伊陽縣。民有女幼孤。而冒賀氏
產。鄰人證其非。是而籍之。後鄰人死。女訴復請所籍
產。久不能決。洙問若年幾何。曰。三十二。乃按咸平籍。
二年賀死而妻劉爲戶。詰之曰。后五年始生。安得賀

姓耶女遂伏

晉張希崇鎮汾州有民與郭氏爲義子自孩提以至成人因疾不受訓遣之郭氏夫婦相次俱死有嫡子已長時郭氏諸親與義子相約云是親子欲分其財助而訟之前後數政不能理遂成疑獄希崇覽其訴狀斷云父在已離母死不至雖假稱義子孳二十年撫養之恩儻曰親兒犯三千條悖逆之罪大爲傷害名教安敢理認田園其生涯並付親子所訟人與朋黨者委法官以律定刑聞者服其明斷

邴吉字少卿，漢宣帝時爲廷尉。陳留有富翁，年九十，娶田客女爲妾，一交接而死。後生男，大男謂其母曰：「我父年尊，無復人道，一宿斯須，何因有子？」汝小家淫佚，反欲污我種類乎？爭財數年，州郡不能決。邴吉曰：「聞真人無影，老人子亦無影，又不耐寒，可共試之。」時八月中，取同年小兒俱解裸之。此兒獨啼言寒，並日中行，後獨無影，人咸服。

孫能傳曰：按荊州上律鄉人張元始，年九十七生兒，兒無影。見南史柳州曹泰，年八十三，生子名曾，日

中無影年七十方卒

見朝野僉載

觀此二事，邵吉驗影

之說不虛也。

魯穆爲福建僉事，富民周允文無後，以姪繼之。晚而妾生子，因析貲與姪，以子及產託之。周死，姪謬言子非叔出，逐之。妾訴其故，穆乃密處其子於羣，見中歷試諸父老，咸指是兒。類周遂歸其產。

陳茂烈爲吉安府推官，有夫制於悍妻，嫁有娠之妾。既生子，歸承其業，族人爭之，驗與姊氏爲類，爭者愧服。

薛用弱集異記曰、蘭陵蕭穎士、楊府功曹秩滿、南
遊行、侶共濟瓜洲、舟中有二少年、熟視穎士、相顧
曰、此人甚有肖於鄱陽忠烈王也、穎士是鄱陽曾
孫、卽自款陳、二子曰、吾識爾祖久矣、穎士以廣衆
中未敢詢訪、俟及岸、方將啓請、而二子忽遽負擔
而去、穎士必謂非仙、則神虔心嚮、矚而已、明年穎
士北歸、止於盱眙邑長之署、方與邑長下簾、盡坐、
司門遽白云、某吏於某處、擒獲發塚盜、共五六人、
登令召入、皆反接其手、束縛甚固、旅之于庭、穎士

懸認江中二少年亦在內。驚曰：斯二人非僊則神。因其述前事，邑長卽令先窮二子。二子欵伏佐驗。明著，皆云發丘墓有年矣。頴士以前說，再令詢之。曰：我嘗開鄱陽王塚，大獲金玉，當門有貴人，頴色如生，年約五十，髭鬚班白，僵卧於石榻，姿狀正與頴士相類，無少差異。我升中遇子，又是蕭氏，固是鄱陽胤也。因此啓言，豈有他術哉？用弱嘗聞人之紹續，其或三五世，則必一人有肖其祖先之形狀者。斯豈驗與？

觀以上數則知子孫真偽當有以貌爲斷者亦有貌不可悉如韓億洋州之獄

宋叅政韓億知洋州日有大校李甲以財豪於鄉里誣其兄之子爲他姓賂里娼之貌類者使認之爲已子又醉其嫂而嫁之盡奪其貲嫂姪訴於州及提轉積十餘年不能白億至又出訴億察其冤因取前後案牘視之皆未嘗引乳醫爲證一日盡召其黨立庭下出乳醫示之衆皆伏罪子母復歸如初

烏程縣有富民張甲妻王無子張納妾於外生子未

昨王誘妾以兒來尋逐妾殺兒焚之縣尹干文傳聞而發其事得死兒餘骨王厚賄妾之父母買鄰家兒謂妾所生兒初不死文傳令妾抱而乳之兒啼不就乳妾父母吐實乃呼鄰婦至兒見之躍入其懷乳之卽飲王伏罪

小兒無定識他人乳抱三日卽迷其父母故凡聽此等獄者宜速不宜緩緩之則作僞者易入而聽難以達也

李南公知長沙有娣婦攜兒以嫁七年兒族取兒婦

請非前子。訟於官。南公問兒年。族曰九歲。婦曰七歲。問其齒。曰去年毀矣。南公曰。男八歲而齒。尙何爭。命歸兒族。

小兒有齒遲之症。齒遲亂亦遲。其蚤者亦然。○男八歲毀齒常也。亦或六七九十不等。今使此子未毀。將何如。故凡以年定獄者。當雜以干支年號。生肖所屬。及乳名。筭命帖。參互求之。自無遁情。又或問其排行。及兄弟年數。

李若谷守井州。民有訟叔不認其爲姪。欲併其財者。

累政不能直、李令民還家、毆其叔、民辭不敢、李固強之、如其言、叔果訟姪毆逆、因而正其罪、分其財、

蘇州徐某、巡撫山西、鄉中有無藉、冒充徐子、糾黨牧人、乘官舫、持符沿途稟廩給夫馬、經過州縣、莫識其僞、直抵徐所轄境、府官館諸公所、爲徐言之、徐驚曰、我止一子、且年幼、在家讀書、並不出外、豈有來此之理、府官再三言之、且詢其年貌、俱非是、甚怪之、卽呼之入、無藉衣冠楚楚、顏色自若、見徐輒行父子禮、不待徐發言、哢哢然先以家事告、次則起居安否、稱阿

爹不絕口。徐見之怒甚，氣塞，反不能措一語。府官旁視，疑以爲真。徐無可奈何，惟大呼吏卒，視其冠服，欲痛加拷問。無藉，婉容柔聲告曰：「阿爹不必怒，兒來問安耳，別無他故。」吏卒驚疑，袖手不敢前。徐怒極，亟以手拍案，無藉乃匍匐至案前，緊抱徐足，抵死不釋。垂曰：「阿爹不要兒來，今晚就回，必不敢逗遛也。」徐面色如土，旁觀者反疑徐矯情過甚，各長腕代爲請曰：「固非大人子，不宜甚怒，千金之軀，請自珍愛。」徐不得已，命桎梏之，付有司推問。時藩臬俱候門外，見徐怒不

敢入私相議曰此必真也寧有僞者而敢如是哉既而無藉出見各官在門顧藏手械於袖拱揖言曰家尊素性如此諸公幸勿訝各官益被惑皆致敬答之私囑隸役釋桎梏反厚餽禮物官船送之不令徐知而問官竟以在逃對所過驛遞供應益豐腆往反間卒無辨其僞者將抵蘇則不知所在矣及徐移文根究杳不可得噫彼以假來吾當以假待從寬羈繫之寧無敗露處邪。

毛先舒處童妃議曰弘光稱號江南時有童氏自稱

故妃來南中、命付錦衣衛嚴刑拷之、已瘐死于獄、或
曰、忍心哉是舉也、其他或可以假冒、若夫婦則幽隱
細微之必悉、必無敢於假冒而自赴死者、是童氏之
爲王妃審矣、因亂相失、間關而來、蓋義篤于儼體而
不忘故君、自當迎歸大內、正位椒宮、乃不但棄之、且
殺之、此一事可以亡國、或曰、否、后也者、天下之母儀
也、童氏流落而來、焉能保其無失身事、其猶可配至
尊而爲宗廟之主乎、留之適足以彰國家之醜、拒而
斃之以滅其迹、則所全實多、毛先舒曰、二說也、兩俱

有礙。蓋正位椒宮固不可，而殺之則傷道已甚。昔者
呂后被掠於項羽，先主妻子兩掠於呂布，一掠於曹
操，及歸高祖先主，仍與爲夫婦如初，而二君未嘗以
此貶德。卽近今多亂，而婦人被掠，其不能完節明矣。
然其夫往往多方求贖，人猶相助以爲義舉。蓋遭亂
者固不得以平時概之，而婦人不得已被辱，又不可
等于是自作淫佚如賈南風、韋后之類。此所以可赦而
不可殺者也。至於正位之說，則其身已屬流離之餘，
又豈可儼然表率六官而爲天地宗廟社稷主？自余

論之童妃自應迎之入內居之別宮不復尊以位號而供養則仍如法以無失前此之恩禮而已若皇后則別行冊立斯人倫與國體兩全而無礙惜乎臣下無以此說進之也夫古來廢后供諸別宮者多矣漢孝成許后廢處昭臺宮趙后貶徙北宮宋郭后居瑤華宮後孟后亦居瑤華宮當時何憚而不爲此嗚呼瘦死者實寃且慘徒自彰失德以上干天和而且遺譏於天下萬世又何足以爲全國體也哉

娠月考異

姙子十月常也亦或久近不等醫學正傳言有十七八月至二十四五月者余聞萬曆時紹興楊氏婦夫死遺腹三年生子族人疑之因名子天授蓋曰是殆天授非人力也實以寓腹誹云事不數見無解乎惑偶稽載籍畧記之

秦始皇帝姙期年生史記 符堅十二月十六國春秋

慕容雋十二月十六國春秋 劉撈十二月晉書

胡時亨十二月警心隨錄 堯十四月漢書

禹十四月通甲開山圖解

契十四月拾遺記

漢昭帝十四月漢書

李雄十四月十六國春秋

王守仁十四月年譜

劉聰劉淵十五月十六國春秋

朱橋十五月史纂左編

郭垣二十二月珍殊船

黃帝二十四月史纂左編

王嘉二十四月史纂左編

陽翟婦人妊三十月生子從背出嵩山記

李泌孕三年寤而生髮卽至眉郭侯外傳

女隤氏孕三年啓左脅生六子其三彭祖大戴禮人物考云

老彭十一年生

溫磐石三年劉敬叔異苑

唐僧圓澤見婦人錦襦負兒而汲語人曰此婦孕已三年吾當爲之子吾不來故不乳今旣見無可逃者

至暮澤亡而婦乳

蘇東坡集
甘澤謠

慧能在母腹六年

壇經
序

伏羲十二年

路史

大人國孕三十六年生兒白頭長大

勝尊者處胎六十年

佛經

老聃七十二年

神仙傳
左編八十

年一

過期或曰由漏胎或曰氣虛蕭炳曰妊婦食馬肉令子過月或則曰有一婦每孕必數年豈皆食馬

肉乎。要之天下大古今遠。慎母執常見也。

七月生者。所在有之。多育。八月多不育。李時珍曰。

七變而入不變也。按黃牛羗人六月生。魏書獠人

七月生。博物志明邵武劉維正女嫁龔默。七月生

子。默父應祥以爲先孕。出其婦已三載。女舅父金

指揮子與維正有隙。遂誣訟於郡。謂女孕出維正。

維正默應祥。皆諸生。俱蒙羞。而維正尤甚。無以自

明。黃岡李賓卿守邵武。心疑之。偶讀石室秘藏。載

有七月生子事。出以示人。於是羣疑釋然。女寃乃

白孫能傳一之曰按吾學編宋潛溪學士以七月
生黃岡陶廉訪珪亦然生時顙骨尚未合吾鄉李
侍御娶婦七月生子怒而出之後再適里中仍七
月而生子侍御大以爲悔李文正公東陽以八月
生此是女子血氣有餘之故往往以此蒙汚不能
自明折獄者所以貴博證也益智編

又嘗聞之七月生兒手指才有骨尚無有皮血肉
模糊以線解之乃能分十指後漸長完好亦竟成
丈夫云。

偽書券

江郎中

郎簡

劉沆

李德裕

趙顯之

元絳

章類

王文恪

王恂

高定子

張鷟

劉正

歐陽修論蔡襄事

張楚金

賈后謀廢太子

陵州仁壽縣有里胥洪氏利鄰人田給之曰租我田
我爲收若稅免若役鄰人喜刻其稅役而租之踰二
十年且僞爲券以茶染帑類遠年者訟之縣縣令江
某郎中取帑券展開視之曰若遠年紙裏當色白今
表裏如一僞也詆之果伏

侍郎簡知寶州。有掾吏死。子幼。贅壻僞爲券。取其田。後子長。屢訴不得直。訴於朝。下簡劾治。簡以舊案示之曰。此爾婦翁書。曰然。又取僞券示之。弗類。斯乃伏罪。

丞相劉沆知衡州。大姓尹氏欲買鄰人田。莫能得。鄰人老而子幼。乃僞爲券。及鄰人死。卽逐其子。訟二十年不得直。沆至。又訴。尹氏出積歲戶鈔爲證。沆曰。若田百頃。戶鈔豈特收此乎。始爲券時。嘗問鄰乎。其人多在。可取爲證。尹不能對。遂伏罪。

唐李德裕出鎮浙右有甘露寺主事僧訴交代得常住什物被前主事僧隱沒金若干兩引證前數輩皆還相交割文籍在焉衆辭以新受代者隱用鞠成獄然未窮破用之所德裕疑有枉微以意揣之僧乃訴曰居寺者樂於知事前後主之者積年以來空交分兩文書實無金衆以某孤立欲乘此擠之德裕曰此無難也乃召堯子數乘命關連僧入對事遣入堯子門皆向壁不令相見命取黃泥各令模前後交付金形狀以憑證據僧既不知形狀各模不同前數輩皆

伏罪

趙顯之爲閩鄉令時一農家累歲借粟於富者因別
贏家給當年不用貸富者貪利怨之以爲借于別主
乃賂先保人同捏借粟文字以索之不伏訟於官顯
之曰此易見耳乃監保人富者各一處以物色審之
曰般借粟時大車耶小車耶斗量耶斛打耶倉中耶
窖中耶取狀相合人各不同遂伏騙賴之罪

宋元絳知永新縣豪子龍聿誘少年周整飲搏以伎
勝之計其貲折取腴田立券久而整母知之訟於縣

縣索券爲證，則母手印存，弗受。絳至，母又來訴。絳視券呼謂聿曰：「券年月居印上，是必得母他牘印尾而撰僞券續之耳。」聿駭謝，即日歸整田。

侍御史章頻知彭州九隴縣。時眉州大姓孫延世爲僞券奪族人田，久不能辨。運使委頻驗治。頻曰：「券墨浮朱上，決先盜用印而後書之。」旣引伏，獄未上，而其家人復訴于轉運。更命知華陽黃夢松覆案，無所異。黃用是召爲御史。

王文恪留守西京，長水縣申請買木錢數百千。王視

狀亟呼吏作教下縣。遣買木一行人械送府。既至。皆以屬吏。吏請其故。王曰。凡公文皆先書押而後印。今此狀乃先印後書。必有奸也。勒之。果重疊冒請盜印爲之者。

少師王恂知昭州。有誣告僞爲州印文書。獄久不決。吏以印文不類。恂索景德舊牘。視其印文無少異。誣者乃服。蓋其文書景德時者也。

高定子知夾江縣。鄰邑有爭田十餘年不決。部使者以屬定子。定子察知僞爲質劑。其人不服。定子曰。嘉

定改元詔三月始至縣安得有嘉定元年正月文書耶兩造遂決

程顯察院初爲京兆府鄠縣簿民有借兄之宅居者發地藏錢兄之子訴曰父所藏也令言無證佐何以決之顯曰此易辨耳問兄之子曰爾父所藏錢幾年矣曰四十年彼借宅居幾年矣曰二十年矣卽遣吏取錢十千視之謂借宅者曰今官所鑄錢不五六年間卽徧天下此錢皆爾未借居前所鑄何也其人遂服

唐張鷟字文成爲河陽尉有人言呂元者詐懷倉督
馮忱書盜糴倉米忱不認書元乃堅執不能斷鷟取
元告狀用紙貼兩頭唯留二字問是汝書卽註云是
不是卽註云非元乃註曰非乃去貼卽是元狀先決
五十又貼詐爲馮忱書留一字以問之註曰是去貼
乃詐書也元於是伏罪

折獄龜鑑曰鷟蓋已知其誣而欲使之服故括字
以覈其姦問書以證其愚斯不可隱諱矣亦安得
不服乎

元劉正爲戶部令史至元八年罷諸路轉運司立局
考核逋欠大都運司負課銀五百四十七錠逮繫倪
運使等四人徵之視本路歲入簿籍實無所負辭久
不決正徧閱吏牘得至元五年李介甫關領課銀文
契七紙適合其數驗其字畫皆司庫辛德柔所書也
辛貧窘時已富實結交權貴莫敢誰何正廉得其實
白尚書捕鞠之辛伏罪四人得釋

歐陽修曰蔡忠惠公自給事中三司使除禮部侍郎
端明殿學士知杭州初上入爲皇子中外相慶知大

計已定矣。既而稍稍傳言有異議者，指蔡公爲一人。及上卽位，始親政，每語及三司事，便有忿然不樂之意。蔡公終以此疑懼，請出。既有除命，韓曾二公因爲上言：「蔡襄事出于流言，難以必信。前世人主以疑似之嫌，害及忠良者，可以爲鑒也。」臣修亦啓曰：「或聞蔡襄文字尚在禁中，陛下曾觀之否？」上曰：「文字卽不曾見，無則不可知其必無。」臣奏曰：「若無文字，則事未可知。」就陛下曾見文字，猶須更辨真僞。往時夏竦欲陷富弼，乃先令婢子學石介書字，歲餘學成，乃僞作介

與弼書謀廢立事書未及上爲言者廉知而發之刺
仁宗聖明弼得免禍至於臣丁母憂服闋初還朝有
嫉忌臣者乃僞撰臣一劄子言乞沙汰內官欲以激
怒羣阉是時家家有本中外喧傳亦賴仁宗保全得
至今日由是而言陛下曾見文字猶須更辨真僞何
况止是傳聞疑似之言何可爲信

唐垂拱年則天監國羅織事起湖州左史江琛取刺
史裴光制書割取字合成文理詐爲與徐敬業反書
以告及差使推光欵云書是光書語非光語前後三

使盡不能央奉勅令差能推事人劾遂當見實狀曰
張楚金可令劾之又不移前款楚金憂悶仰卧向窓
透日影見之其字皆補葺作之平看則不覺向日則
見之因集州縣官吏索一杯水令琛取書投水中字
一一解散琛叩頭服罪奉勅令央一百然後斬之賜
金絹一百疋

晉賈后將廢太子遹詐稱上不和呼太子入朝既至
后不見置于別室遣婢陳舞賜以酒棗逼飲醉之使
黃門侍郎潘岳作書若禱神之文有如太子素意因

醉而書之。令小婢承福以帋筆及書草使太子書之。
文曰：陛下宜自了，不自了，吾當入了之。中宮又宜速
自了，不了，吾當手了之。并與謝妃共要剋期而兩發。
勿疑。猶豫致後患。茹毛飲血于三辰之下。皇天許當
掃除患害。立道文爲王。蔣氏爲內主。願成當三牲祠
北君。大赦天下。謝妃太子生母。道文太子之子。彬也。
太子醉迷不覺。遂依而寫之。其字半不成。后就而補
成之。以呈帝。帝召公卿入。使黃門令董猛以太子書
及青帋詔曰：遺書如此。令賜死。徧示諸王。公莫有言。

者惟張華裴頠證明太子頽以爲宜先檢校傳書者
又請比校太子手書不然恐有詐妄賈后乃出太子
啓事十餘帋衆人比視亦無敢言非者賈后使董猛
矯以長公主辭白帝曰事宜速決而羣臣各有不同
若有不從詔宜以軍法從事議至日西不決后懼事
變乃表免太子爲庶人詔許之太子旣廢與妃王氏
書曰鄙雖頑愚念爲善欲盡忠孝之節無有惡逆之
心雖非母所生奉事有如生母自爲太子以來數見
禁檢不得見母自宜滅君亡不見存恤恒在空室中

坐、去年十二月、道文疾病、因篤父子之情、實相憐憫、
於時表國家乞加徽號、不見聽許、疾篤爲之求請恩
福、無有惡心、自道文病、中宮三遣左右來視、云天教
呼汝、到二十八日暮、有短函來、題言東宮發疏云、言
天教欲見汝、即便作表求入、二十九日早、入見國家、
須臾遣至中宮、中宮左右陳舞見語、中宮旦來吐不
快、使在空屋中坐、須臾中宮遣陳舞見語、聞汝表陛
下、爲道文乞王、不得王、是成國耳、中宮遙呼陳舞、昨
天教與太子酒聚、便持三升酒、大盤棗來見與、使飲

酒啖棗盡鄢素不飲酒卽便遣舞啓說不堪至升還
意中官過呼曰汝常陛下前持酒可喜何以不飲天
與汝酒當使道文差也便答官中陛下會同十日見
賜故不敢辭通日不飲三升酒也且實未食恐不堪
又未見陛下飲此或至顛倒陳舞復傳語曰不孝那
天與汝酒飲不肯飲中有惡物耶遂可飲二升餘有
一升求持還東宮飲盡逼迫不得已更飲一升飲已
體中荒迷不復自覺須臾有一小婢持封箱來云詔
使寫此文書鄢寫驚起視之有一白帟一青帟催促

云、陛下停待、又小婢承福持筆研墨黃昏、使來寫急疾、不容復視、實不覺帶上語、輕重父子至親、實不相疑、事理如此、實爲見誣、想衆人見明也、

仁和之鄉曰橫塘者、其地多富人、嘗有一募緣僧、至此擊梆數日、徑去、越年餘、持簿來、則諸富人俱已列姓名及銀錢於上矣、字畫肖似、皆無以自辨、有與爭論者、則爲歷歷言之曰、去年某月日、汝家有某事、或某親友在座、是時所書云云、然所謂月日親友諸事、皆實相符、而登簿之說、絕荒唐也、

記錢數者常云若干文。惟橫塘李正亮每云若干個。此簿亦作個字。故諸人雖明知其妄而被纏不已。亦頗以爲奇。竟各如數與之。未知所操何術也。抑豈如所謂追魂帖者類耶。聞之其鄉胡襄仁。

匿名書

魏國淵

王安禮

漢昭帝

萬曆時妖書

殷雲霽

韓昭宗

柳慶

禮月

詩卷

詩冊錦軸

魏國淵字子尼爲魏郡太守正直無私有投書誹謗者太祖甚疾之欲知其主淵請留其書而不宣露其書多引二京賦淵乃勅功曹曰此郡旣大今在邠輦而少學問者其簡開解年少欲遣就師訓以所學未及二京賦博物之書也世人忽畧少有其師可求能讀者從受之又密喻旨旬日得能讀者遂往受業因

請使作箋。比方其書。與投書人同。緡收攝案問。具得其情。

左丞王安禮字和甫。尹京日。市有匿名書。誣告一富家有逆謀。都城稍恐。和甫不以爲然。數日有旨根治。和甫搜富家無迹。因詢其怨耦。曰。數日前有鬻狀人馬生。嘗有所貸。弗與。頗積怨言。和甫乃密以他事綰馬生至對。款卽取謗書字校之。畧無少異。鞠之。果馬生所作。

漢昭帝初立。燕王旦怨望謀反。而上官桀忌霍光。因

與旦通謀詐令人爲旦上書言光出都肄郎羽林道上稱蹕擅調益幕府校尉專權自恣疑有非常俟光出沐日奏之帝不肯下光聞之止書室中不入上問大將軍安在桀曰以燕王發其罪不敢入詔召光入光免冠頓首謝上曰將軍冠朕知是書詐也將軍無罪光曰陛下何以知之上曰將軍調校尉以來未十日燕王何以知之且使將軍爲非何必校尉時帝年十四尚書左右皆驚而上書者果亡

錢養廉病餘日筆曰萬曆甲辰京師妖書之獄書不

知何從來。題曰國本攸關。內稱上暉愛福王。有易儲
意。指朱山陰相公爲戎首。金吾王之禎。李禎國等附
之。而四明相公亦首鼠其間。山陰得書。懼禍。列狀以
聞。上大怒。召皇太子指天自矢。痛哭不能出聲。下嚴
衛。懸賞格。購能獲者。予千金。一日旨三四下。限大索
十日。掌緝騎王之禎。素與同官周嘉慶有隙。疑周傾
已。而周河南人。亦素剛戾。不爲同儕所悅。私計書中
獨歸德相公不與。益疑出周手。乃請旨窮治。備極楚
毒。妻孥並受極刑。業誣服。上命東廠太監陳矩覆訊。

案驗無狀，爲具列其寃。上益怒，下令曰：「再十日不獲，併所司逮治。」舉國徬徨，計無所出。捕風捉影，自執政以下，皆重足立，而緹騎輩或借以恐嚇取財。凡詞人墨子，縑流羽上，流寓京師，以無辜破家隕命者，不可勝數。有數生光者，故順天庠生也，舞文作姦，問戍者三矣。數年前，曾題詩挾詐鄭貴妃家金錢。詩中有關國本等語，疑與書類而上。意嚴切，至停諸御史差遣。日久不得主名，諸司恐益株連，乃據前詩爲證。文致生光抵法獄成，磔西市。余謂妖書指斥吾鄉，兩相而

不及歸德。此意不難解。蓋以疑間三相。使鼠鬪穴中。徐收漁人之利耳。後四明與歸德果不相能。言者互爲荆棘。卒同日罷。墮奸計矣。至于曠生光。罪故宜死。然妖書事無確證據。訊者冀苟且結局耳。巡城御史沈裕實主其議。生光臨刑稱冤。數目沈未幾。沈奉差至毘陵。暴死。人謂生光爲祟也。當時踪跡詭秘。蓋不數傳。淚之椎云。

山陰朱賡四明沈一貫歸德沈鯉也

正德中。殷雲霽字近夫。知清江縣。民朱鎰死于文廟西廡中。莫知殺之者。忽得匿名書曰。殺鎰者某也。某

係素仇。衆謂不誣。雲齊曰：此嫁賊以緩治也。問左右與鎧狎者誰對曰：胥姚。雲齊乃集羣胥于堂曰：吾欲寫書各呈若字有祝明者，字類匿名書，詰之曰：爾何殺鎧？明大驚服。鎧將販于蘇，明利其貲，殺之也。

樊舉人者，壽寧侯客也。侯貴震天下，樊負勢結助戚貴臣，一切奏狀皆出其手。每駕空無事，貲爲怨家所發，事下刑部。郎中韓紹宗知其實，攝樊舉人。樊匿壽寧所甚深，百計出之。下獄數日，一旦韓出門見地上書一卷，取視，則備言樊罪狀，宜必置之死。韓笑曰：此

樊舉人所自爲書也。詰之果服。同僚問樊何以自爲。此曰韓公非可動以勢。所生則必死。今言死者左計也。韓曰不然。若罪原不至死。于是發戍遠。

周柳慶爲雍州別駕。有胡家被劫。莫知賊所。隣近被囚者甚多。慶以賊徒旣衆。似是烏合。旣非舊交。必相疑阻。可以詐求之。乃作匿名書多榜官門曰。我等共劫胡家。徒侶混雜。終恐洩露。今欲首伏。懼不免誅。若聽先首免罪。便欲來告。慶乃復施免罪之榜。居二日。廣陵王欣家奴面縛自告。因盡獲黨與。

東坡志林曰元豐初白馬縣民有被殺者畏賊不敢告投匿名書于縣弓手甲得之而不識字以示門子乙乙爲讀之甲以其言捕獲賊而乙爭其功吏以爲法禁匿名書而賊以此發不敢處之死而投匿名當流爲情輕法重皆當奏蘇子容爲開封尹方廢滑州白馬爲畿邑上殿論奏賊可減死而投匿名書者可免罪上曰此情雖極輕而告訐之風不可長乃杖而撫之子容以爲賊不干已者告捕而變主匿名本不足深過然先帝恐長告訐之

風此所謂忠厚之至

錢養廉曰。當楊曾構釁。邏者緝有播使禮目一紙。自執政以下。皆有賂遺。臺省至形之白簡。余謂此必中國姦人騙局。無足信也。且安知非小醜爲離間計乎。况受否不可知。據以爲罪案。寃矣。京師遊食四棍。實繁有徒。往往假稱權貴親故。過付管幹。而主人實不知也。以余之孤介寡合。不妄接一人。在銓曹時。尚有冒予假書。四投于澤者。乃知小人機詐百出。惟恃素行足孚于人。且訛言止于智者。吾輩遇此。當別察而

屏遠之不至墮其雲霧。

又曰，尤七者，本長安牧童，江陵嬖之後，遂爲掌記，性慧黠，善承同意，指江陵無鉅細皆與謀。方江陵盛時，氣焰薰灼，欲干請者必先與七通，無論倖人，僕帥，握手結歡，卽吾儕中，濡足其門者，往往杯酒殷勤，講兄弟之好，時號尤楚瀨。江陵敗，七逮繫，籍其家，得詩卷，皆館閣諸名公贈章，新建四明亦與焉。此真贗莫辨，設以此爲罪牘，冤哉。監司張望湖命燬之。張又稱要人投賄江陵署名封識者甚多，亦亟滅去，遂不傳。

張公之陰德溥矣

江陵張居正新建張位四明沈一真

又曰江陵倖奴尤七籍沒所藏館中諸名公詩扇墨跡甚多稱號稱兄褒揚阿諛備諸醜態賴當事亟滅其跡設以此上聞按籍而問何說之辭其實此等事乃小人借以貢諂未必皆真請以兩事質之常呂文安柄政時治第省城一豪奴爲經營居守奴饒于貲春元中有與結懽者余少年偶見其出一詩冊春元二十餘人并先觀察亦列其中余識其筆跡出一同年手歸以叩先觀察果無有也近日孫繼造行一春

元製錦軸以贈列名者五十餘人與聞者不過數人孫酬謝百兩後因分金不均衆始知之至于青衿干請有司公呈公軸往往甲冒乙名甚至假借名流以聳動觀聽殊不足據

誹謗也誣陷也疑間也匿名者之常也嫁賊也左計也則匿名之變而巧者也雍州以之縛盜白馬以之得賊匿名之術固亦詭奸者所不廢耶譬若烏董然庸醫畏其殺人也者而良醫卽以之生人惟視乎其用而已矣國淵之延師王和甫之對欵

殷雲霧之寫書，皆以不動聲色得姦人萬曆國本之書，幾成大獄。此由庸相懼禍之念，釀其釁，不然付之一炬可矣。而何足以入君與儲耳目間耶？至哉匿名之律。曰：凡投隱匿姓名文書告言人罪者，絞。見者即便燒毀。若將送入官司者，杖八十。官司受而爲理者，杖一百。被告言者不坐。彼山陰相公也者，當時其未讀此耶？何憚惜也。讀書萬卷不讀律，致君堯舜終無術。誠哉是言乎？至若禮目贈章等屬，雖非匿名，而亦與匿名爲類。此無論受却不

可知。真偽不可辨。即使果受果。真則凡權姦未稔。惡時賢人君子何能盡絕其往來。而况賢人君子有權姦必欲致之以爲光者。陳實所以弔張讓。楊時所以受蔡京薦。吳與弼所以署石亨門下士。李東陽唐順之。所以委蛇於劉瑾嚴嵩之時。卽聖如孔子亦未却平陽貨蒸豚之餽。使一不免於言者之口。則此瞞亾之拜也者。不幾目爲寶玉大弓之盜黨也哉。宋真宗時有卜者上封事言干官禁上怒令捕之。繫獄坐以法。因籍其家得朝士往還書。

牘上曰此人狂矣果臣僚與之過從盡可付御史
獄案劾王文正公得之以歸明日獨對曰臣看卜
者家藏文字皆與之筭命選日草本卽無言及朝
廷事臣託往來亦曾令推步星辰其狀尚存因出
以奏曰果行乞以臣此狀同問上曰卿意如何公
曰臣不欲因此卜祝賤流累及朝廷上乃解公至
政府卽時焚去繼有大臣力言乞行欲因而擠之
上令中使再取其狀公曰得旨已盡焚之事乃寢
明永樂時廣東布政使徐奇入覲戴領南藤簞將

以餽廷臣。邇者獲其單目以進。上視之。無楊士奇名。乃獨召之問。故士奇曰。徐奇自都給事中受命赴廣。時衆皆作詩文送之。故有此餽臣。時有病無所作。不然亦不免。今衆名雖具。受否未可知。且物甚微。當亦無他上意。解卽以單目付中官。令毀之。嗚呼。此二事者可爲聽禮目贈章等獄之大法也已。

狂瘖

王罕

柳渾

高防

大理王罕知渾州。有狂姬數邀訴事。言無倫理。從騎屏逐之。罕令引歸廳事。扣堦徐問。姬雖言語雜亂。然時有可采者。乃是人之嫡妻。無子。其妾有子。夫死。爲妾所逐。累訴不直。因恚而狂。罕爲直其事。盡以家貲與之。

唐柳渾爲江西察判。時僧有夜飲火其廬者。歸罪瘖奴。軍候受財不詰。獄具。渾與其僚崔祐甫。白奴寃於

觀察使魏少游促訊其僧僧乃首伏沈括筆談云世人以竹木牙骨之類爲呌子置喉中吹之能作人言謂之類呌子常有瘖者爲人所苦煩免無以自言聽訟者試取呌子令類之作聲如傀儡子粗能辨其一二。免乃獲伸此亦可記。

高防初事周爲刑部郎中宿州有民刺刃其妻而妻族受賂奪州言病風狂不語並不拷掠以具獄上請大理斷令夾杖防覆之云其人病風不語醫工未有驗狀憑何取證便坐杖刑况禁繫旬月豈不呼索飲

食再効其事必見本情周祖深以爲然終置於法
瘖者易爲禍所嫁以其不能白也狂者易爲姦所
假以其不可詰也徐以問之徵以伺之其於得情
也何有

盜嫁禍

張公謹

象馬驛

南郊失金籠

明昌間、景州一婦、畜二奸夫、隸卒馬全、王二、皆不使相知也。婦欲歸寧、與王二約曰、城外某樹下相會。馬全適聞之、爲恨、先往。婦至、輒殺之。婦父因事入城、問女所在。姑曰、昨已往親家家也。父愕然、尋跡於某樹下、得屍、告之於官。有司按其姑曰、近日有與兒婦共語約者否。姑曰、某坊王二實約之、遂收王二推勘、不勝苦楚、招之、勘者復問婦所挈衣服所在、王二漫指

於某道傍某樹下埋之使人往索得之持至王二駭然曰如何果有吏人張公謹曰此虛招也權州能假三日限爲擒此賊從之公謹詢於勘院門者曰我昨勘事時曾有人在垣外否門者曰隸卒馬全者在垣久之而後去復詢於城門吏曰昨晚曾有挈衣囊出城者否曰有馬全者矚人靜而後出也公謹曰此事審矣攝全至一問卽承時人稱爲神明

京師有盜劫一家遺一冊視之盡富室子弟名書曰某日某甲會飲某地議事或聚博挾娼云云凡二十

條以白於官。按冊捕至。皆跣跣少年也。良以爲是。各
父母謂諸兒素不逞。亦頗自疑。及群少飲博。諸事悉
實。蓋盜每偵而籍之也。少年不勝榜毒。誣服訊。賍所
在。浪言埋郊外某處。發之。悉獲。諸少年相顧駭愕曰。
天亡我輩矣。遂結案俟決。一指揮疑之。而不得其故。
沉思良久曰。我左右中一髯。職參馬耳。何每訊斯獄。
輒侍側。因復引囚鞠數四。察髯必至。他則否。猝呼而
問之。髯辭無他。卽呼取炮烙具。髯叩首請屏左右。乃
曰。初不知事本末。唯盜賂奴。令每治斯獄。必記公與

囚言馳報許酬我百金乃知所發贓皆得報宵瘞之也髯請擒賊自贖指揮令數兵易雜衣與往至僻境悉擒之諸少乃得釋祝允明日成化中南郊事竣撒器失金瓶一有庖人執事瓶所捕之繫獄構掠誣服謬云瓶埋壇前某地覓之不獲仍繫之俄真盜以瓶繫金絲鬻於市市人疑之聞於官逮至則衛士也招云既竊瓶急無可匿遂埋於壇前只捩取繫索耳發地果得之比庖人謬言之處相去才數寸使前發者稍廣尺許則庖人死不白矣何必參馬髯在側乃可

疑哉。訊盜之難如此夫。

詰盜者必以真贓爲斷也。主二京中少年南郊庖人皆有真贓者也。真贓之不足憑也如此。而覓于贓之未必真者乎。君子所以貴盡心也。

盜遺一冊即可疑矣。夫有爲盜而自立供案以預令人之得以踪跡者乎。無是情理也。試自此而詳察其所由來可矣。乃據此以捕訊諸少年有是理乎。此當時詰盜者之懵而指揮之疑所由起也。

代刑

時奚

朱壽昌

包孝肅

張定叟

吉州王某幹者殺人以錢三百千與一村老令代認。曰爾認不致償命但杖六七十下而已。民以爲然。時奚司理政疑之。曉以禍福。村老遂以實告。時奚見同囚者一人項有傷痕。疑爲死者傷之故殺死者。鞠之未伏。王因言於奚以爲然。且力言於郡守。同囚者不勝苦。遂準伏抵死。奚以平反政秩旋死。時咸淳年也。後幹者認殺人遂伏法。方言前斷之枉。

朱壽昌知閬州有大姓雍子良殺人乃買里民使出就吏獄具壽昌因得其情引囚訊之囚對如初乃告之曰吾聞子良遺汝錢十萬納汝女爲子婦許嫁其女汝家有之乎囚色動又告之曰汝且死書僞券抑汝女爲婢指十萬爲贖直而嫁其女他人汝將奈何囚泣下吐實收子良付法

包拯知開封有犯杖脊徒罪者吏受財與之約曰今見尹須使我責狀汝但號呼自辨我當與汝分罪各受杖決旣而引責囚如吏言分辨不已吏入大聲呼

之曰、但受脊杖出去、拯謂其招權、粹吏杖之、特寬囚罪、亦令從杖、公知以此折吏勢、不知乃爲所賣。

建康溧陽市民、同日殺人、皆繫獄、獄具、以囚上府、亦同日就道、二囚時相與語、監者不虞也、夕宿邸舍、甲謂乙曰、吾二人事已至此、死固其分、顧事適同日、計亦可有爲者、我有老母、貧不能自活、君到府、第稱寬、悉以諉我、我當兼任之、等死耳、幸而脫君、君家素溫、爲我養母、終其身、則吾死爲不徒死矣、乙欣然許之、時張定叟杓尙書知府事、號稱嚴明、囚旣至、皆呼使

前問之及乙則曰某實未嘗殺人殺之者亦甲也張
駭異使覓其說曰甲已殺某人既逸出其家不知爲
甲所殺也平日與某有隙遂以聞於官已而甲又殺
某人乃就捕某非不自明官闇而吏賄故寃不得直
也張以問甲甲對如乙言立破械縱乙一縣大驚甲
既論死官吏皆坐失入抵罪而張竟不悟甚哉獄之
難明也

幹者殺人村老既以實告矣何爲更疑同囚者豈
所告者未悉與如告以幹者云然何不卽訊幹者

何故云然耶。惜乎記之不詳。然所疑不惟是。夫王固言之于奚以爲然。夫非切已何以知其然而爲奚言耶。惜奚莫之疑也。

杖徒者法也。法所在不可故爲加減也。開封吏招權舞法也。包公特寬罪囚。廢法也。因吏招權并廢法。不可以訓。然則如之何。曰。杖吏脊。囚杖脊。徒如初。

甲乙殺人。同日同地。甲故可以兼任之。然獄未具則可耳。獄已具矣。四上府矣。有由有狀。有見有仗。

有傷爲仇、爲盜爲爭、由也。爲謀爲散爲毆狀也。爲鄰爲族爲伍保見也。爲挺爲刃爲他物使也。爲長短爲淺深爲尖圓廣狹傷也。二之不可以兼猶一之不可以二也。甲何可兼而乙何可脫耶。其用者得兼而乙之得脫也。由干初案之未確也。不然傳者妄也。

有外奸

裴均

馬裕齋

周新

許襄毅

吳復

裴均鎮襄陽里人妻有外情者乃託病於夫曰醫視妾病云是骨蒸須獵犬肉食之則瘥夫曰吾家無犬何以致之妻曰東鄰有犬每來盜物可繫而屠之夫如言屠犬以獻妻留之篋筒命鄰人告焉均鞠之立承具述妻前後之故均曰此必妻有他奸欲顯夫於法耳劾之具得其真乃置妻及外情者於法

馬裕齋知處州禁民捕蛙有一村民將冬瓜切作葢

斬空其腹實蛙於中。黎明持入城爲門卒所捕。公心怪之。問曰：汝何時捕此蛙？曰：夜半有知者。語曰：惟妻知。公追其妻詰之。乃妻與人通。俾妻教夫如脫。又先往語門卒收捕。意欲陷夫於罪而據其妻也。真妻及奸夫於法。

一巨商遠回未抵家而日暮恐孤行爲人所圖潛以其貲置一祠石下至家妻問之告以故明日求之無有也訴之周新新曰是必爾妻有外遇也覈之果然蓋歸語妻時摸之者竊聽先往取之矣遂併治之

歷城縣人出商三年歸得金二百餘深夜埋母墓側
詐爲折本狼狽而歸妻不勝悽慘夫告之日吾得銀
二百埋母墓側明當取來至期則已失矣訴諸官無
可白者許襄毅公曰暮夜無知所告惟妻耳蓋必其
妻先有所私從旁竊聽不然天下豈有神輸鬼運者
耶乃逮妻訊之果然

溧水人陳德娶妻林歲餘家貧備於臨清卜續麻自
活久之爲左隣張奴所誘意甚相愜歷三載陳德積
數十金囊以歸離家尙十五里天暮且微雨德慮懷

寶爲累、乃藏金於水心橋第三柱之穴中、徒步抵家、而林適與張狎、聞夫叩門聲、匿床下、既夫婦相見、勞苦、因敘及藏金之故、比晨往、而張已竊聽、赦後扉出、先掩有之矣、林心不在夫、聞亡金、疑其誑、且有怨言、時署縣事晉江吳復、有能聲、德爲訴之、吳笑曰、汝以腹心向妻、不知妻別有腹心也、拘林至、嚴訊之、林呼任德、心憐妻、願棄金、吳叱曰、汝許六金、戲官長乎、置德獄中、而釋林以歸、隨命吏人之黠者爲丐、客造林、察之、得張與林私問慰狀、並擒治之、事遂白、

失婢妾

錢若水

邊郎中

雍泰

張謙

宋錢若水爲同州推官。有富民家小女奴逃亡。不知所之。奴父母訟于州。命錄事叅軍鞠之。錄事嘗貸錢於富民。不獲。乃劾富民父子數人共殺女奴。棄屍水中。遂失其屍。或爲元謀。或從而加功。罪皆應死。富民不勝捶楚。因自誣伏。具獄上。州官審覆無反異。皆以爲得實。若水獨疑之。留其獄。數日不決。錄事詣若水。廳誓之曰。若受富民錢。欲出其死耶。若水笑謝曰。今

數人當死。豈可不熟觀其獄詞耶。留之且旬日。知州
屢趣之。不能得。上下皆怪之。若水一旦詣州。屏人言
曰。若水所以留其獄者。密使令訪求其女奴。今得之
矣。知州驚曰。安在。若水密使人送女奴於知州。乃垂
簾引女奴。父母問曰。汝今見汝女識之乎。對曰。妾有
不識也。因從簾中推出示之。父母泣曰。是也。乃引富
民父子。悉破械縱之。其人號泣不忍去。曰。微君之賜
其滅族矣。知州曰。推官之賜也。非我也。其人趣詣若
水廳事。若水閉門拒之。曰。知州自求得之。我何與焉。

其人不得入繞垣而哭傾家貲以飯僧爲若水祈福
知州以若水雪冤死者數人欲爲奏論其功若水固
辭曰若水但求獄事正人不冤死耳論功非本心也
且朝廷若以此爲若水功當置錄事於何地耶知州
嘆服曰如此尤不可及也錄事詣若水叩頭愧謝若
水曰獄情難知偶有過誤何謝也於是遠近翕然稱
之未幾太宗聞之驟加進擢不半歲爲知制二年中
爲樞密副使

開封屠子胡氏婦行素不潔夫及舅姑日加笞罵一

日出汲不歸。胡訴之官。適安業坊中有婦人屍在。眚井中者。官司召胡認之。曰。吾婦一足無少趾。此屍足趾全非。吾婦也。婦父母素怨胡氏。又索辨。而乃抱屍哭曰。此吾女也。久失愛。舅姑是必撻死。置井中以逃罪耳。時暑。不三二日。屍已潰。畧一驗。有司權瘞城外。下胡氏獄。考驗鍛鍊百至。胡遂自誣服。事上刑部。宋法。歲遣使審覆諸路刑獄。是歲刑部郎中遷某來開封。視成案。卽知冤濫。謂宜慰使安文玉曰。是婦不死。安執不肯改。乃令人徧閱城門所揭諸人捕亡文字。

中有賈客逃婢一人中所索辯及他物色與屍狀同迹其所寓正皆井處也賈客已他適矣於是使人監故瘞屍者令掘起元屍將詢其所主與隣僉曰然瘞者出曹門涉河東岸指一新塚曰此是也發之乃一男子屍執前說曰埋時盛夏河水方漲此輩病涉棄屍水中矣是男子以青帶總髮必江淮新鹵無疑訊之果然安心知其寃以未得逃婦不肯釋胡氏會開封故吏徐沼州一僕於迂妓中得胡氏婦問之乃出汲而溜奔於人轉售娼家其事乃白

雍泰知吳縣民有妾亡者妾父訟其夫密殺吾女兩
月匿屍湖中石下泰召其夫訊之夫曰妾逃兩月跡
求不可得妾父脇財始知死所泰使人瘞其屍乃訊
父曰夫密殺汝女汝安知匿於石下此又豈兩月屍
耶此必非汝女汝殺他人女以勾賂耳一拷而服
慈谿張觀察謙謫尉揭陽有許氏者縱其女與漳人
通漳人誘去匿之渡口許氏誣其壻黃金殺女欲抵
金死以滅口公廉知女渡江第莫得其所罾處以許
逮舟子而集邑人縱觀公詭曰舟子利女蓋面籍諸